


**A una Signora de Roveredo** 


mandandoghe in dono un libro de " Cantilene ,,  
 nel ripeterse de l'anno secolar  
 che la so zità passava  
 — da Marco a Massimilian —

MDIX-MCMIX  
 Questo centesim'anno ancor s' incinqua  
 DANTE, *Paradiso*

La senta, Signora,  
 che festa de rime !  
 Xe 'l dir che inamora  
 che tuto l' esprime.

Chi xè che se vanta ?  
 Qua, l' omo xe gnente ;  
 xe l' aria che canta,  
 xe 'l cuor de la zente.

Se tase 'l strumento,  
 se l' arpa xe sorda,  
 apena che 'l vento  
 ghe toca la corda,

resússita, svola,  
 canora se leva  
 la viva parola  
 che l' arpa no aveva.

Oh, musica vecia  
 che Marco ne intona,  
 te vien a la recia  
 co un far da parona,

col far d'una mama  
 che tuti afradela,  
 che tuti ne ciama  
 atorno de ela.

Te dixè - « Dai monti  
 che varda 'l Tirolo,  
 al mar che dei Ponti  
 sa 'l nome e del Molo,

sié tuti cressudi  
 disendo de Sì,  
 sié tuti venudi  
 a scuola da mi.

Go a tuti insegnà  
 le megio parole ;  
 la cuna e 'l sagra  
 la cesa e le scuole.

Go tuti istruíto  
 nei nomi più bei :  
 a tuti dir Dio,  
 dir Mama ai putei.

Co Uscochi per tera,  
 co Turchi per mar  
 ve ò trato a far guera,  
 ve ò fato tornar,

e, allora, del Tempio  
 go scritto su l' arco  
*Xe in pólvare l'empio ;*  
*Eviva San Marco ! » -*

Cussì quella cara  
 parola ne canta !  
 La cuna e la bara  
 per ela xe santa ;

la patria profondo  
 ga un segno per ela :  
 nessuno a sto mondo  
 quel segno canzela !

I Secoli passa,  
 i vol che la tasa ;  
 ma, in fin, i la lassa  
 parona de casa.

Bonora, la svegia  
 chi suda la paga ;  
 le done, in famegia,  
 la giuta e la svaga ;

la fa coi fioleti  
 alegro ogni logo ;  
 la sta coi veceti  
 scaldandose al fogo ;

la canta a la festa,  
 la pianze nel luto,  
 e par che la vesta  
 de musica tuto.

La senta, Signora,  
 che festa de rime !  
 Xe 'l dir che inamora,  
 che tuto l' esprime !

A. SERENA

